

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 3/2023-mik Inatsisartut ilaliinissaannik siunnersuut Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutiga

- **nunani avannarlerni killerni avatangiisinut naalakkersuisut 2024-mi ataatsimeeqatigiissasut**
- **nunani avannarlerni killerni avatangiisinut naalakkersuisut nerisassanik maangaannartitsisarnerup annikillisinneqarnissaanut nunat ileqqorisaannut tunngatillugu misilittakkanik avitseqatigiissasut**
- **nunani avannarlerni killerni avatangiisinut naalakkersuisut nerisassanik maangaannartitsisarnerup annikillisinneqarnissaanut suliniutaasut eqqartussagaat taamaalillutillu Nunani avannarlerni inuussutissanik pilersuinerup isumannaatsuunerulernissaanut ikiuutaallutik.**

(Doris J. Jensen, politikikkut oqaaseqartartoq, Siumut)

Akissuteqaat

(Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaq Doris J. Jensen, Siumut, siunnersuummut saqqummiunneqartumut qutsavigaara.

Qulequtaq pingaarutilik, aammalu Naalakkersuisut pingaartitaat, qaqinneqarpoq. Nunarsuarmi nerisassanik maangaannartitsisarneq avatangiisinut annertooujussuarmik sunniuteqartarpoq. Ilaatigut inuussutissanik tunisassiornerup assartuussisarnerullu annertuumik aniatitsiviusartut suliasaqarfiunerat pisutaalluni, aammalu nioqqutissiassat ilai maangaannartiinnarneqartarmata, avatangiisinut sunniisarneq annertuneruliinnartarpoq. Tamanna pingaartumik nunanit niueqatigisartakkatsinnit inuussutissanut atuuppoq. Inuussutissat ungasissorsuarminngaaneersuusarput, tamatuma saniatigut ingerlasussanik piareersaannikkut kinguaattoornit, nioqqutissiassat nutaat pisiniarfinnut apuunnerminni asioreersimasarnerannik malitseqarsinnaasartumit, taakkua unammilligassaqartinneqartarput.

Inuussutissat qanoq pitsaanerumik atorluarneqarsinnaanersut paasiniarniarlugu Naalakkersuisut aalajangerput. Tassami imminut pilersornissamat periusissiasami tamannarpiaq ukkatarineqartussaavoq. Ilaatigut inuussutissanik tunisassiornermit eqqagassanngortartut atorluarneqarnissaanut periarfissat periusissiami misissorneqartussaapput. Suliniutissat suut, isumalluutigit *tamakkerlugit* atorluarneqarlutik, pitsaanerumik kaaviiartumik piujuartussamillu nunatsinni tunisassiornerup ingerlanissaanik qulakkeereqataasinnaanersut, imminut pilersornissamat periusissiami isummerfigineqartussaavoq.

Nunat Nunani Avannarlernut Killerniittut allat suleqatiginerulernissaat, ilisimasanik avitseqatigiittarneq misilittakanillu paarlaasseqatigiittarneq pingaaruteqartorujussuusut Naalakkersuisut akueraat. Tassami nerisassanik maangaannartitsisarnerup akiorniarneqarnissaanut ataatsimoorluni suliniuteqarnissaq pisariaqarpoq, tassami tamanna nunarsuarmi unammilligassaammat. Taamaattoq nunanut allanut qiviannginnatsinni, najukkami nerisassanik maangaannartitsisarnerup siulliullugu isiginiarnissaa pisariaqartinneqarpoq.

Tamanna tunngavigalugu Naalakkersuisut naliliipput qulequtaq siullertut najukkami sammineqqaartariaqartoq. Tassunga tunngatillugu Naalakkersuisut Kalaallit Nunaanni nerisassanik maangaannartitsisarnermut paasisutissanik kisitsisinillu piniarlutik, kiisalu suliniutit suut ingerlareernersut paasisimaarniarlugu, ataasiakkaanik nioqquteqartartut kiisalu Kalaalimeerniarfiit attaveqarfiginissaat siunertaraat. Oqaloqatigiinnermi Ataasiakkaanik nioqquteqartartunik kiisalu Kalaalimeerniar-

10-05-2024

UPA2024/158

fiit oqaloqateqarnermikkut Naalackersuisut Kalaallit Nunaanni nerisassanik maangaannartitsisarnermut tunngatillugu tunngavissaqalersitsissapput paasisimaarilersitsissallutillu.

Naalackersuisut isumaqarput siunissami Nunani Avannarlerni Killerni sanilitsinnut nerisassanik maangaannartitsisarneq pillugu misilittakkanik paarlaasseqatigiittarnissaq pingaaruteqartussaasoq, kisianni maani nunatsinni siullermik tamakkiisumik paasisaqalaarallarta.

Naalackersuisut tamanna tunngavigalugu inassutigaat aalajangiiffigisassatut siunnersuut itigartinneqassasoq.